

食貨典第五十二卷

大田制部彙考十二

皇清二

康熙元年

大清會典戶部田土一丈量康熙元年覆准山東省民地內錯雜竈地有在本省者有在直隸南皮鹽山縣者歷年不清令巡鹽御史及地方官清丈各正疆界

開墾凡課墾勸懲康熙元年題准各官勸墾照順治十五年例議叙外如一年內督撫能遞加墾至八千頃以上者加一級紀錄一次一萬二千頃以上者加二級道府墾地四千頃以上者加一級紀錄一次六千頃以上者加二級州縣官墾地四百頃以上者加一級紀錄一次六百頃以上者加二級衛所官墾地一百五十頃以上者加一級紀錄一次二百頃以上者加二級如州縣衛所有荒地一年內全無開墾者令督撫題參將道府州縣衛所官各罰俸半年又題准墾地後復荒者削去督撫等官開墾時紀錄加級督撫罰俸一年道府降一級住俸州縣

衛所官降三級住俸勒限一年督令開墾如限內墾完者開復不完者督撫降一級罰俸一年
道府降二級調用州縣衛所官降三級調用其前官墾過熟地後任官復荒者亦照經管開墾
各官復荒例治罪 又覆准荒地捏報墾熟者原報督撫降二級罰俸一年道府降四級調用
州縣衛所官革職 又題准各省開墾甚少定限自康熙二年爲始五年墾完六年秋請
旨遣官嚴查各省墾過地畝如荒蕪尙多督撫以下分別議處

田土二牧廠草場康熙元年題准天師庵草場歸併崇文門部員管理其原設官役甲兵俱裁
又覆准榆林城外牧地一十六頃三十六畝零令地方官招民佃種

田土三衛所屯田凡歸併屯衛康熙元年覆准雲南屯田越境零星不便歸併州縣且屯田賦
重民田賦輕恐有司徵收一境異例仍令衛弁管理

康熙二年

大清會典戶部田土一開墾凡招民墾荒議叙康熙二年

諭遼東招民百名者不必考試俱以知縣錄用

凡投誠官兵墾荒康熙二年覆准凡投誠人原有入官田地仍令給還改入民田

田土二各旗莊屯凡撥給八旗官員兵丁

盛京田土康熙二年題准看守

孝陵內大臣給園地十五晌

凡撥給八旗官員兵丁畿輔田土康熙二年題准新來佐領給地五晌撥什庫給地三晌

牧廠草場康熙二年題准錦縣馬廠地仍留備用牧馬不許民間開墾 又覆准甘鎮牧地三頃二畝今招民承種入甘州中衛徵糧

田土三衛所屯田凡設官管屯康熙二年覆准江南屯糧現係驛傳道兼攝令照浙江湖廣等省例改歸都司督催

康熙三年

大清會典戶部田土一開墾凡課墾勸懲康熙三年題准各省布政司亦有督墾之責嗣後照督撫例議叙 又覆准府同知不與知府同城勸民開墾者照州縣例議叙

田土二各旗莊屯凡撥給八旗官員兵丁

盛京田土康熙三年題准看守

孝陵各官給園地不等總管十二晌噶喇大十晌郎中六晌員外郎等五晌

康熙四年

大清會典戶部田土一丈量康熙四年覆准直省田地荒熟相間恐有隱佔著令丈量如有司及里書弓手攤派詐擾令督撫題參

開墾康熙四年覆准湖廣歸州房縣等處民歸故業酌給牛種銀兩不拘次年徵收例令三年後補還

凡課墾勸懲康熙四年題准限年墾荒恐州縣捏報攤派行令停止

凡招民墾荒議叙康熙四年題准招民百家者不論年分次序以知縣先選

田土三衛所屯田凡歸併屯衛康熙四年覆准宣府並延慶保安二州各衛所營堡不必歸併

仍舊管轄

康熙五年

大清會典戶部田土一開墾康熙五年覆准白旗堡小河西兩處地畝令奉天府府尹給民耕種照熟地例輸賦廣寧遼兩縣曠地給民開墾不許旗人侵佔

田土三衛所屯田凡設官管屯康熙五年覆准陝西衛所屯糧與民糧一體輸納無畝運領運之事不必改歸都司仍令布政司總理

康熙六年

大清會典戶部田土一開墾凡課勸懲康熙六年覆准通判自行督墾者照州縣官例議叙又題准勸墾各官一年內照數墾完者准議叙不准以二三年墾數合算又各官俟三年起科時應徵錢糧如數全完取具里老無包賠甘結題請議叙其署印官墾荒與掌印官一體議叙凡招民墾荒議叙康熙六年覆准遼東招民百家者嗣後咨部停其先選仍論年分次序選授凡投誠官兵墾荒康熙六年覆准江南浙江江西山東山西河南六省分駐投誠官兵每員名給荒田五十畝自撥給日爲始預支俸餉以備牛種次年停支俸餉三年後照民例起科其福

建投誠官兵本省舊無荒田令分駐有荒田省分屯墾

田土二各旗莊屯凡撥給八旗官員兵丁畿輔田土康熙六年題准八旗地有坍塌成河者准與換給其出城或被澇地不准換給

田土三衛所屯田凡屯田額賦康熙六年覆准江南石城等衛屯田改折太重仍舊徵收本色凡設官管屯康熙六年題准廣東雲南經徵屯糧係屯道職掌衛所各官俱令屯道稽察

康熙七年

大清會典戶部田土一丈量康熙七年覆准陝西洛川縣地向係八畝四折正一畝宜川延川二縣地四畝折正一畝近因興屯報墾浮開入冊令照舊改正毋致累民

開墾凡招民墾荒議叙康熙七年題准遼東招民授官例永著停止又題准四川文武各官招民復業每百家紀錄一次四百家加一級五百家加二級六百家加三級七百家以上不論俸滿卽陞

凡投誠官兵墾荒康熙七年覆准投誠官兵眷口衆多每五名口加地五十畝如不足五名口

數者每名口加地十畝

康熙八年 三月初八日

上諭戶部前以爾部題請直隸各省廢藩田產差部員會同各該督撫將荒熟田地酌量變價今思小民將地變價承買之後復徵錢糧則民重累著免變價撤回差去部員除變價已完田地外將現在未變價田地交與該督撫給與原種之人令其耕種照常徵收錢糧以副朕愛養生之意至於無人承種餘田應作何料理著議奏爾部卽遵諭行特諭

六月十七日

上諭戶部朕繼承

祖宗丕基父安天下撫育羣生滿漢軍民原無異視務俾各得其所乃愜朕心比年以來復將民間房地圈給旗下以致生民失業衣食無資流離困苦已極深爲可憫以後圈占民間房地著永行停止其今年所圈房地俱著退還民間爾部卽速通行曉諭昭朕加惠生民至意至於旗下無地亦難資生應否將古北等口邊外空閒之地撥給耕種著議政王貝勒大臣會同確議具奏

特諭

大清會典戶部田土一開墾凡課墾勸懲康熙八年題准停止督撫墾荒加級紀錄之例

凡投誠官兵墾荒康熙八年覆准墾荒官兵年額俸餉恐預支耗用來春東作無力應以到汛日爲始按月支給俟次年正月支給全年俸餉以資開墾又覆准墾荒官兵定例三年後起科如被災傷再寬一年起科

田土二各旗莊屯凡撥給八旗官員兵丁

盛京田土康熙八年題准圈撥民間田房屢經停止邇來有因旗下退出荒地復行圈補者有遊牧等處投來人丁復行圈撥者有因圈補時復圈接壤民地者百姓失業堪憫今張家口殺虎口喜峰口古北口獨石口山海關外各有曠土如宗室官員及甲兵有願將壯丁地畝退出取口外閑地耕種者該都統副都統給印文咨送按丁撥給

凡撥給八旗官員兵丁畿輔田土康熙八年

諭房地圈撥旗下百姓多致失業嗣後永行停止其今年所圈房地俱著退還民間

康熙九年

大清會典戶部田土二各旗莊屯凡撥給八旗官員兵丁畿輔田土康熙九年題准官員甲兵地畝不許越旗交易其甲兵本身種地不許全賣又題准官員撥補地畝不遵部文擅撥給別項地畝者罰俸一年

康熙十年

大清會典戶部田土一開墾康熙十年題准新墾地三年後再寬一年起科

凡課墾勸懲康熙十年覆准四川現任文武大小各官招徠流民三百名以上安插得所墾荒成熟於五年後起科時不論俸滿卽陞

凡招民墾荒議叙康熙十年議准貢監生員民人墾地二十頃以上試其文義通者以縣丞用不能通曉者以百總用一百頃以上文義通者以知縣用不能通曉者以守備用又覆准四川各官招民三百名以上墾荒起科後不論俸滿卽陞如係准貢例監生員出身者卽准保舉照常陞轉直省候選州同州判縣丞舉貢監生有招民三百名以上於未設官州縣安插者授

以署職令其墾荒五年起科時督撫具題實授本縣知縣於已設官州縣安插者墾荒起科後以別縣知縣先用如四川人不便補授本省給文赴部另補其准貢監生既准招民以知縣用卽准保舉照常陞轉其生員不便遽授知縣停其招民又覆准凡招民墾荒督撫具題戶部核明起科果實送吏兵二部照例分敘又覆准招民不足額數墾地錢糧未經起解假捏取結具題者捏報州縣官革職轉報司道府降四級調用題報督撫降二級調用凡投誠官兵墾荒康熙十年題准四川隨征投誠各官有招民三百戶以上安插墾荒於五年起科時咨部以立功官員補用

田土三衛所屯田凡屯田額賦康熙十年覆准廣東屯糧十倍民田荒蕪者多令照民地重則每畝八升八合起科

凡設官管屯康熙十年覆准山東屯糧向係司府催徵今改令都司管轄

康熙十一年

大清會典戶部田土一開墾康熙十一年覆准墾荒地令於六年後徵糧

凡招民墾荒議叙康熙十一年題准武進士以上各官開墾荒地二千畝以上者亦於應授職銜加一等用

凡投誠官兵墾荒康熙十一年題准投誠兵丁墾荒展限至六年後起科

康熙十二年

大清會典戶部田土一開墾康熙十二年

詔小民拮据開荒物力艱難恐催科期迫反致失業以後各省墾荒著再加寬限通計十年方行起科

凡招民墾荒議叙康熙十二年議准四川招民之人考試文義優通者授知縣疎淺者授按察司經歷

田土二各旗莊屯凡撥給八旗官員兵丁

盛京田土康熙十二年題准凡欲往

盛京領地設莊護墳者若將分內壯丁地退出准撥熟地不願退出者以荒地撥給

古今圖書集成
牧廠草場康熙十二年題准太僕寺種馬場向係戶部撥給入官人看守今

內府並諸王貝勒等馬匹就馬場內餘丁選補看守如無可選者仍行令戶部撥給

康熙十四年

大清會典戶部田土一開墾凡課墾勸懲康熙十四年覆准江南浙江江西恢復各州縣有田存丁絕及田多丁稀者招同里甲戶丁耕種頂納錢糧州縣官一年內果能勸輸足額者准其不論俸滿卽陞又議准官員希圖優叙說報開墾及查出隱地以致累民者照例議處加級紀薦卓異卽陞俱不准抵銷

康熙十五年

大清會典戶部田土一開墾康熙十五年議准開墾田畝徵糧全完取結題報者應隨奏銷錢糧一同具題若遲悞照違限例議處

凡課墾勸懲康熙十五年題准各省墾荒如有不照十年起科例先期勒徵及過期不徵或私減地畝定額錢糧者州縣衛所官革職司道府都司各降三級調用督撫各降一級留任如不

照所限年分預詳請徵勒民開墾及開墾地畝以多報少以少報多或以先墾之地後又重報或不分晰荒熟地畝混行造報或應徵在民錢糧不查出者州縣衛所官降一級調用該管上司各罰俸一年

田土二各旗莊屯凡撥給八旗官員兵丁畿輔田土康熙十五年覆准官員不對閭部冊支給口糧地畝者罰俸兩箇月筆帖式等罰俸一箇月其察對冊籍係司官職掌堂官不必議處田土三衛所屯田凡歸併屯衛康熙十五年覆准各衛所荒田坐落州縣境內縣查則指爲軍地衛查又詭爲民田行令督撫嚴檄州縣衛所各官逐一查報不得推諉以滋影射

康熙十七年

大清會典戶部田土一丈量康熙十七年覆准遼東旗民錯居清丈難以定限令地方官每年設法清查許民自首不論多寡隨勘隨報

康熙十八年

大清會典戶部田土一開墾康熙十八年覆准開墾荒田仍准六年後起科

古今圖書集成
康熙十九年

大清會典戶部田土一丈量康熙十九年覆准奉天地自撫順起西至寧遠州老君屯止南自蓋平縣攔石起北至開原縣止共丈出荒甸地五百八十萬一千四百二十一晌除燒磚及打草甸馬廠甸羊草甸地三十一萬七千二百六十六晌外實丈出地五百四十八萬四千一百五十五晌分定旗界內地四百六十萬五千三百八十晌民界內地八十七萬八千七百七十五晌凡新來之民在民界內安插緣邊次第墾種其原在旗界內居民有願移民界內墾種者有仍願在旗界內墾種原地者聽從其便至旗人民人力不能開墾荒甸又復霸占者嚴查治罪

康熙二十年

大清會典戶部田土二各旗莊屯凡撥給八旗官員兵丁畿輔田土康熙二十年題准滿洲新歸旗者停給園地

凡撥給外藩田土康熙二十年題准蒙古新歸旗者停給園地

康熙二十二年

大清會典戶部田土二各旗莊屯凡撥給宗室勲戚莊田康熙二十二年八旗司冊開數

鑲黃旗宗室整莊四所半莊一所園一所共地六百一十晌坐落大興通州武清平谷河間各州縣

正黃旗宗室整莊五所半莊十二所莊四所園三所共地一千七百七十六晌坐落大興宛平三河寶坻順義涿州房山保定雄縣易州任丘各州縣

正白旗宗室整莊四所莊一所園二所共地六百晌坐落順天香河通州寶坻房山及沙河所正紅旗宗室整莊一百四十五所半莊三所整園五十所半園十一所園四所共地二萬七百三十六晌零坐落順天宛平昌平涿州文安保定定興涞水及遼陽海城蓋平各州縣

鑲白旗宗室整莊一百七十八所半莊五所莊八所整園八所園二十所果地畝地網戶獵戶等地七十六處共地二萬八千六百一十九晌零坐落大興宛平良鄉固安永清東安香河通州三河武清寶坻昌平密雲懷柔房山霸州薊州玉田平谷遵化豐潤遷安灤州樂亭保定易州河間任丘滄州保安及遼陽海城蓋平鐵嶺山海關外等處

鑲紅旗宗室整莊二百九十八所半莊二十三所莊五所整園一百十一所半園二所共地四萬三千八百三十五晌坐落大興宛平永清香河通州寶坻昌平涿州房山霸州灤州新城河間肅寧滄州延慶及張家口外等處

正黃旗宗室整莊五百四十四所半莊一百五十一所莊二十二所整園一百三所半園十九所園七十三所果菜牧地五處共地八萬八千五百五十四晌零坐落大興宛平良鄉永清東安香河通州武清昌平順義懷柔涿州房山霸州保定薊州玉田平谷遵化豐潤永平昌黎灤州樂亭新城易州青縣無極保安及承德遼陽開原錦州寧遠廣寧開平冷口外等處

鑲藍旗宗室整莊二百三十一所半莊六十三所莊九所整園一百二所半園二所園三所共地三萬七千五百七十九晌零坐落大興宛平固安永清東安昌平懷柔灤州蓋縣安州高陽及遼陽海城蓋平錦州開平等處

田土三學田學田之設原以供春秋享祀及贍給貧士之用有舊置者有助給者歷年多寡不一茲據康熙二十二年直省冊報總計學田三千七百一十七頃二十八畝六分八釐八毫零